

رمضان محمد سليمان

# كلام فنجان

أشعار بالعامية المصرية

الطبعة الأولى ٢٠١٧

## بطاقة الكتاب

عنوان المؤلف : كلام فنجان  
المؤلف : رمضان محمد سليمان  
التصنيف : أشعار بالعامية المصرية  
رقم الإيداع : 23000 - 2017  
عدد الصفحات : 100 صفحة  
رقم الإصدار الداخلي : 72  
تاريخ الإصدار الداخلي : 11 / 2017 طبعة أولى  
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر  
طبع ونشر وتوزيع الكتاب الا بموافقة كتابية وموثقة من الشاعر

### دار النيل والفرات للنشر والتوزيع

سجل تجارى : 58365  
بطاقة ضريبية : 165-5-00031-572-01-35  
رقم التسجيل : 202-662-544 2017-7  
E-mail: alnile waalforat@yahoo.com  
twitter: النيل والفرات  
youtube: alnile waalforat@yahoo.com  
facebook: alnile wa alforat  
هاتف : 01011256943 - 01116202218 - 01202541192



الشرقية - العاشر من رمضان - مجاورة ١٣ - عقار ٣٠٤ - الدور الثانى - أمام سنتر ١٣

# الإهداء

كان نفسي يكون موجود معايا  
أقصد والدي بهديها لروحه  
ولست الكل أُمي ... اخواتي البنات  
والواد العنيد شقيق روعي سندي وقدري  
للبنات الرقيقه اللي سابت اهلها  
وجت تعيش معايا .  
بحبها زي ولادي محمد وأحمد وملك  
لاصحابي .. وشلة الأنس .  
للكامب وفريق الايجبشن توب تيم  
ولنفسى كمان  
روميو

# كلام فنجان

ما تيجي نكمل القصه  
ونقرا الكف والفنجان  
طريقك ببتي لسه  
وختي الدرس بالمجان  
هربتي ف أول الحصه  
جابولك رقوه ضد الجان  
قالولك حاسبي م الخسه  
وم الحيله وم الجدعان  
فقلتي ف سكتك مرسى

ويمك مزرعة مرجان  
وصلتي السكه متأخر  
لبستي لنفسك الفستان  
وغنيتي ياريت انسى  
هويتي البعد والتحنان  
وحبك جرحك المفتوح  
وجع مايع ملوش وجدان  
وهمسك لمسك المسموح  
بريشة قلبك التعبان  
مفيش ألوان  
مفيش غير الفرار عنوان  
في آخر سكتك موال  
حروفه بتلعن المكتوب  
وايه مكتوب ؟!

أمل محبوس ومتكتف  
مثل مدسوس على الأرفف  
وايه دا كمان ؟!  
طلاس حلك المغتال  
عملها عزول  
طلوع ونزول  
وخير بيزول  
مفيش غير الفراق على طول  
عمل معمول  
تعيشي الوهم والترحال  
ولا يهدي لولادك بال  
خلاص خلصت بشؤم الفال  
يابنتي اتوضي وارتاحي  
هاتنسي القصه والي اتقال

## فى الغربه

هنا ف البعد بيقولوا إن انا مجنون  
وحابس نفسي ف الذكرى كما المسجون  
وكام واحد يقتلني وأنا نايم  
وأنا باحلم بصوت على و همس حنون

.....

ولما الصبح يحكولى يزيد شوقي  
ويجري الدم ف عروقي  
وأقوم ارجع على اوضتي  
انا جى الطيف على ذوقي  
واعاتب.... لاجل أكون صادق  
بعدنا وبرضو مش فارق

بنتقابل

ونتسامر

ونسهر بالليالي عناق

ونرسم لوحه للعشاق

ملانه حنين

بعدنا سنين

ورغم البعد ما في فراق

ولما اشتاق

اطلع صوره من جيبي

حاططها ف حافظه فوق قلبي

واملي عنيا يا حبيبي

واحني ايديا بلهيبى

وابوس الصوره واحضنها

واحلف روى ما تغيبى ....



## هاقولك إيه ؟!

أنا والله مش لاقى كلام احكيه  
عن اللي حصل لي واللي أنا فيه  
نسيتي القسوه ف بعادي ؟!  
نسيتي إن انتي بتعادي ؟!  
وراجعه تنادي تاني عليه ؟

...

بلاش م الوحشه تستجديه  
زمان عرفك وما عرفتيه  
ودوب بالدموع جفنه  
وحايل ياما وقسيتي ولا سمعتيه

....

ودلوقتي..... !

ندمتي وغيرتي واشتقتي ؟

في قربك جرحي كان مفتوح

ووقت البوح

بلاقي الرد مشنقتي

....

أقول أكثر

هاقول شفتك ملاك بيطير

هاقول قلبك جرحني كتير

هاقول قلبي ملوش غيرك

وأقول برضو مفيش تقدير

.....

أسرتيني وقتني أمير

كسرتيني وقتني باغير

ومش فاضل ف قلبي مكان

لطنن وجرح او تهجير

...

ماتترجيش شهيد الحب يرجعك

ماتتهجيش وحسي حروفي على مهلك

أنا بدمعي كتبت الوعد ولوحدي

مانيش راجع .. ولو لسه القلب بندهلك

...

# نصيب مقطوع

يعني النصيب مقطوع ؟

يعني اقفل الموضوع ؟

وللا دلع وهزار

وانتي فرشتي الدار

بمهرك المدفوع

...

عزه يا هازه الروح

أنا قلبي تحت الطوع

وحلفت ما في رجوع

غير وانتي ويايا

ودا حقنا المشروع

عزّه يا لذة وبوح  
عجل الفرح مدبوح  
هانكمل المشروع ؟  
وللا انتي ناصبه قلع  
حطّاني ف الممنوع  
ومبيّته النيه  
عملاني رهنيّه  
وتقول اديه ملطوع  
زي العمود مزروع  
وهايشرب المنقوع  
وهاينوي بدري رجوع  
والدنيا هاتنسي  
وأنا اللي راح حسي  
لاجلن ما ابيع ورثي

وَألم لك قرشين  
قُوم تكسري نفسي ؟

بقي دا إسمه برضو حنان  
يا عزه أنا رمضان  
راجعي اللي قلته زمان  
على قد ما أنا هيمان  
جرحي ملوش ديه  
وف ثانيه مش إنسان  
وف قسوة الصوان  
هاوديني يا وليه

## وايه يعني

وايه يعني كاويني الشوق  
وأنا المعنى وأنا المحقوق  
وليه فرحائه وبتحكي  
عن الحب اللي بقا مخنوق

.....

وعن حلمي اللي طائر فوق  
وناس ياما مناها تدوق  
ثواني ف حضن اشواقي  
ومش لاقى لعشقي شروق

.....

وايه يعني ضعيف وياكي

ومش معنى بنبض هواكي

وواقف لو ف يوم تشكي

ابدل شكوتك ضحكه

والون غنوتك سكه

واكرر عزفي وياكي .

....

واخطي الصعب لو منك

واغطي الشوق بعيد عنك

أخاف تتأذي من ناره

وتبعد صورتني عن نك

وايه يعني بحبك موت

وأنا المعنى وأنا المكبوت

أنا اللي اخترت أكون ليكي

وأنا اللي تملي ملهوش صوت ...



# مانتیش أنا

الملح طالع م العرق لاجل الرغبة

علشان ضعيف

والشهد سكر زرعه خايب أيوه دايب

للنضيف

والشعب مجروح بالقوى م الفوضوي

أو م السخيف

مين السبب ؟

إنتي ؟! أنا ؟! ...

م انتي التاريخ اللي اتظبط للأغنيا

إنتي الحضاره المفعمه بالأكمنه

منتيش أنا

ولا بينا أي رباط موده غيرش بس الأمكنه

أما انا

أنا لو جدع كنت ارجمك حد الزنا

ريحة الدعاره المداريه معفنه

منتيش انا

ولا بينا أي وعود وفا يامقشفه

يا مشحتانا للأمم ومنيماننا الأرصفه

ومهجرانا بفقرنا

ومقلبانا ف رزقنا

ومفتشاننا كلنا

إلا يا ظالمه الاغنيا

متشيلي ايدك عننا

وتسيبي حالنا لربنا

قادر يلم اللي اتنكش

ويرد حقي اللي اتهبش  
سيبي اللي عايش ف العشش  
واللي طفش يرجع بروح مطمئه  
يزرع خيال الأرض  
اللي هتموت م العطش

## لاء سعيدہ

هي مين دى اللي مريضه

مصر أنشف م الجريده

هي بس اللي شديدہ

لأجل ما نعدي الطوفان

حتى لو مال الميزان

واستلفنا الحق لفه

حتى لو نشحت كمان

مش هاتفضل حاجه واقفه

واللي عدى خلاص توفي

واللي جيّ أفكار جديدہ

عايزه نتقشف بعفه

ونساعدها بقوت عيالنا

وبدوانا وكل مالنا

حتى لو سيبنا الفريضة

حالفه والله بوقف حالنا

..

وأنت جي تقول مريضه

جي بتخدعني بقصيده

مش بعيدة

ما انت قبلا قلت خاين

قلت عيب الدقن بيضه

أسمع بقه

.....

محناش خدم واسكت بقا

حط العلم ف المحرقه

لو كنا هانعيش مدفونين

فلا بد ننسى المشنقه

..

## مش عارفني... !

يحكي اني فيا جنّي

لما باتعب ويكأني

حد تاني عنفواني

أو أناني ساكنه جنّي

..

لما قالوا معدش مني

لما قلت لنفسي حنى

بكفياني العمر فاني

واللي جاني سألني عني

...

قلت اسيب حبة تأني

لما اغيب واحزن واغني  
للي فاتني من حناني  
ومن زماني والتمني

....

قالوا عني شيطان سكاني  
لما مات الخوف ف نني  
وأما هددت بتفاني مش عشاني  
لاجل دعوه ف يوم تعني

.....

قالوا سحرك يا بني بُني  
وإنه صعب يحل عني  
قمت عامل نفسي راهب  
رحت راكب جمب سُني

.....



قال لي صلى قلت عني  
انت ضلي ونفس سني  
خذ مكاني وعيش زماني  
وابقي سييني جوا سجلي

.....

# هي زِيَّك

الملاح قلب طارح  
واللي راسم عقل سارح  
واللي شوفتيه الحقيقه  
مش خيانة أو مصالح

...

م البدايه مكنش ليكي  
أصله مش لايق عليكي  
كنتي وصلة للتلاقي  
واللي باقي دموع عنكي ...

....

لو ف يوم قالك بحبك  
ألف يوم موقفش جمبك  
كنتي عايشه القصه وحدك  
فاكره قلبه ساكنه حبك ...

....

والصديقه مرايا واضحه  
لو مخاصمه أو مسامحه  
هي زيّك ف الحكايه  
م البدايه وهي واضحه

...

وانتي عايشه الوهم وحدك  
شايفه حُكم الصُبحه ودّك  
قاطفه طرح الدنيا بدري  
وانتي واخذه العهد وحدك

## مغرور

لوقاصد تبعد وتفارق  
وتسيب النصل سنين راشق  
وتعيش الكدبه مصدقها  
وتبان المغدور العاشق

...

لو قلبك لساه مش رايق  
والورد ف نورك مش لايق  
خليك ف الضلمه بتشبهلك  
بالشوك والدمع هتتعانق

..

وتحس بجرحي وتتضايق

وتمني غرورك ف دقايق

ترجع وتشاور تلقائي

معذور بغرورك متعايق

# روحي ملكك

لو طلبتي الروح خديها

بُصي عندك هتلاقيها

جوا روحك دايبه فيها

عاشقه محتاجه الدفا

لامسه دقات الوفا

حسي بيها هاتشوفيها

دي الايديين والعين خوارج

مترا عيش هيمان وهاجج

خشي جوا الروح تعالى

ثبتي العقل اللي واجج

لاجل نظرة شوق ف نـنـك

لاجل قطرة شهد منك

منك انتي وبس ادوقها

تحكي بيها الدنيا عنك

# لازم أنسى

لازم انسى بعد صدك

بعد شوقي وعند قلبك

أيوه خوفك من لقانا

لازم اتعايش ف بُعدك

.....

أيوه هانسي انك عنيا

روح مسكنتش إلا فيا

قاصده تهجرني بهدوءها

والجراج تفضل هديه

...

لازم انسى ومفتكرشي



دمع غرقان منه رمشي

والأمل والأمنيات

حلم مولود لأجل يمشي

....

أيوه هانسي معاكى نفسي

حب ماشي ف عمري عكسي

نبض عايش بس ميت

حرف سافر جوا همسي

..

هانسي أيام التمني

والغرام قبل التجني

عشره أضعف م الورق

هانسي فرح أتخلى عني

....

أيوه هانسي يا بنت فكري  
إن حضنك لسه قدري  
هو ارضك بس عرضي  
حاجه واحده هافتكرها  
مين بايداه حفرلي قبري ...

.....

## زوريني مره

طَب كنتي قولى ان انتى جيه

طَب كنت قعدتك شويه

او حتي شفتي اللي جرالي

من حبايب غدروا بيه

....

كان هايبقي اليوم دا عيد

أصل أنا عايش وحيد

واللي يجي يزورني مره

يدي عمري يوم جديد

....

مش هاسلم للغروب

مش هاقول انك لعوب  
بس لما تفوتي ثاني  
شاوري خلي الخوف يدوب ...

## كلام الليل

أنا لما طال الليل والسهر غلبنى  
وشفت بعنيا النجوم نامت على كتفي  
سألته ليه يا ليل . القمر بيسيبنى  
سهران أعد النجوم وحببي متخفي  
مشغول بناس تانيين ؟!  
هو إحنا مش عاجبين ؟!  
والا احنا مش شايفين ؟!  
العمر منا بيّفوت  
والابتسامه تموت وتاخذني من كفي  
ترميني للأوجاع  
انت يا ليل خداع

والقمر بيّاع باع لي العذاب متصفي

مفهبش ذرة أمل

ولا دوقت غير الممل

تعبت ايه العمل ؟

مش قادر اتحمل

ولا قلبي هايكمل م المرّ مستكفي

....

تحرم عليا يا ليل لاتشوفني ولا اشوفك

لو مهما تبقى طويل تدفني ف حروفك

كان رابع مستحيل اتشفي ف ظروفك

بصيت لقيتني وحيد . حسيت معاك ضعفي

....

ارحم عنيا يا ليل أنا دمعي منشفشي

كان غصب عني يا ليل اعشق وما اكرهشي

والطيف يزور ويميل و غنيا متشفشي  
واكمن قلبي أصيل صابر عليك رمشي  
لامره نام جفني ولا قل يوم عطفي

.....

ارحم حبيب يا ليل مضحكش لمرائتي  
صابر وقلبي أصيل ف بدائتي ونهايتي  
عاشق وحببي جميل يارب انول غائتي  
ارحم حبيب يا ليل خليك بقا ف صفي

.....

متسبش قلبي حزين  
وتغيب سنه واتنين  
وتروح لناس تانين  
وأنا اللي كلي حنين والوعد متوفي

.....

طَوَّلْ فْ أُنْسِهْ يَا لَيْلْ وَاقْصِرْ بَقَا فْ بُعْدَهْ  
مَقْدَرِشْ مِنْ بَعْدِهْ أَسْهَرْ وَحِيدْ سَاعَتَيْنِ  
وَتَنَامْ نَجُومُ اللَّيْلِ أَنَا قَلْبِي عَلَى قَدِهْ  
وَحُرُوفِي يَتَعَدُّوْا  
مَنْقُوشَهْ فَوْقْ خَدِهْ وَجَمَالَهْ فَاقْ وَصْفِي

....

قُلْ الْقَمَرُ يَا لَيْلِ  
يَهْدِيكَ رَبَّنَا تَرْحَمُ  
مَشْ عَايِزْ أَقُولُ تَحْرَمُ  
خَلِينَا كَدِهْ أَحْبَابُ  
شَبَّعْتَ قَلْبِي عَذَابُ  
مَتَقَوْلْشْ نَبِيَّا صَحَابُ ... مِنْ أَمْتِهْ وَأَنَا بَاسْهَرْ ؟  
لَوْ زَيِّي كَانُوا كَثِيرٌ ..  
أَعْدَلْ وَكُونْ أَكْرَمُ



مع قلب حبّ وداب  
والجرح لسه ما طاب  
وحبيبه مستكتر .. وتملي متأخر

....

يا ليل كفايه قسي  
مرّ السنين إتتسي من لمستته لكفى  
من حبه صحي النجوم ونام على كتفي  
وكفه فوق كفي  
بحبه والله يا ليل والقلب مستكفي  
بحبه والله يا ليل وحبه هيكفي

## قلبي عندك

ابعدني الأشواق يا روعي تعبتي روعي  
وامسكي الأيام وروحي لحد دوعي  
شبطني القلب المعلق ف الهوى  
وابقى شدي رباط حنانك فوق جروحي

\*\*\*

فاكره أول نظره ليا عملتي ايه ؟  
فاكره آخر مره شفتك قلتي ايه ؟  
أنا كنت بتنفس هواي  
أنا كنت متونس معاكى  
أنا بعدي عنك جرح مش قادر عليه

\*\*\*\*\*

زَيِّ قَرَبِكَ زَيِّ حَبِّكَ زَيِّ كُلِّ الذِّكْرِيَّاتِ  
أَبْعَثْنِي الْقَلْبَ لَوْ صَايَنَهُ اللَّيْلُ فَاتِ  
وَقَفِي النَّزْفَ اللَّيْلُ غَيْرَ لَوْنِ حَيَاتِنَا  
وَأَوْعَى تَقْصِي عَلَيَا وَتَقُولِي أَنَّهُ مَاتِ

## قلبي اختار

ولاقيت البعد ملوش فايده

غير عند وسهد ونار قايدة

وعذاب ومرار

ومشاعر بكر بتتوضي

وبقسوه عليها بنتعدي

ومفيش أذار

ورجعت مسلم بالقاعده

الحجر الداير له ردّه

والسكه الشينه ماتتعي

ولا فيها عمار

اناراجع ضايع م الهده

سامحيني وكفايه معانده

أنا قلبي اختار

## غصب عني

باللي عندي وعشت فيكي

مش تراضي

غصب عني بحن ليكي

وحلمي فاضي

كنت شايفه بين ايديكي

كان قصادي !

وانتي هنتي وهان عليكي

بالتغاضي واضطهادي

رغم غيرة أخ ليكي

رغم حيرة قلبي فيكي

مش ناسيكي ومشتريكي

وانتي دايره الضهر ليا

حاطه يافطه

( افتراضي وعقله فاضي )

آه ياصدّة نفسي بيكي

لما رسّمتي الأراضي

واتعصرنا ف دين ابوكي

ذلتينا للآعادي

لما شدك من ايديكي

وانتي ساكته وقلتي عادي

دبلوماسي قرار رئاسي

دول ولاد العم ميجادي \*

والمخطط السماوي

الدقون حبة بلاوي

حط عينك ف القهاوي

القرار واضح حياي  
كله يجمع حادي بادي  
كله فرکش يلا غادي ....

\*\*\*\*\* .....

كله عادي ف بيت سيادي  
ف الزمالك ف المعادي  
ف المعسكر والمقدر  
والي عايش ف الزبادي ..

كله عادي لحد قاضي  
حد متملك أراضي  
حد يزعل لو تكبر  
حد مش عاجبه اعتراض  
....



كله جد يا صاحبي عادى  
الا زادي وقوت ولادي  
إلا ذلي واضطهادي  
وإني اسيب الفجوه تكبر  
وانسى حقى ف خير بلادي

....

مش هاسيب حقى ف بلادي  
هاخده من كرش الاعادي  
لوهاكسر أيوه هاقدر  
أخده من اونكل و دادي ...

# عجبي البعاد

يا أجمل مشاعر

يا طيفي المسافر

يا حنة سكاكر

تحلى البعاد

بحبك يا غربه

يا فارزه الاحبه

وناخلة الوداد

يا نبض الليالي

وصوت انفعالي

وعزم الولاد

يا حب السنين

وصرخة جنين

ف ساعة الميلاد  
بحبك يا غربه  
يا وحده وتُربه  
يا بايعه الرماد  
وشاريه اللي غايب  
وقاسمه الحبايب  
ف آخر البلاد  
تعبني وعجبني  
وشوقي اللي جابني  
وقلبي بينبض وواقف حداد

# صابره..1

يا قاعده ودنيك قايمه  
وطافحه الكوته لأجل المم  
يارابطه الحلم ع العايمه  
وغرقانه ف بحر الهم  
يا صابره وصاحيه مش نايمه  
يا شقيانه ومحدث شم  
يا ست الصحه مش دايمه  
ويوم ماتنخي مين يتهم  
ومين يهتم  
ومين هايقول دي طافحه الدم  
طبول دقت رقصانها

دموع العين عرفناها  
حفرنا خدودنا خطين وشم  
وفوق زيك كراسي بریش  
وبرضوا بيكافحوا لأجل العيش  
لكن دولا ميعرفوكيش  
وحر الشمس بره الشيش  
ضماير همها التكويش  
هاقولك ايه ؟  
بقوه وهمّه مش بالطيش  
بدعوه وذمه متوطيش  
وحاربي الدنيا بسنانك  
ولو وقعت متستنيش  
تعالى وموتى ويانا  
أنا جمبي مكان ع الخيش

## صابره. 2

يا صابره وعاضه ف لسانك

تعبنا وتوهنا ف سكاتك

صرخنا وثورنا علشائك

وبرضوا بتخفي اناتك

وصاحيه وفايته عنوانك

مسافره وبايته على مالك

وايه مالك ؟

مفيش مره الزمان عانك

مفيش جرة قلم شانك

مفيش غير الضلام هاتك

وكاشف ستر اناتك

يا صابره كفايه صبرك طال  
ودايره وشايفه زهرك مال  
تعبتي حروفنا وياكي  
ولساكي بطولة بال  
بتدي الصبر ويانا دروس ومثال  
لقلب اتعود الاله  
ورغم الحاجه لساها  
بتدي الكل من خيرها  
وطالبه الجنه مع طه

...

لا محتاجة الزهر يوم يلعب  
ولا ف حاجه لضهر او مطلب  
وكل مناها راحة البال  
ومن حوض النبي تشرب ...

# شمس الحياه

شمس الحياه ضلّمت

وأنا عيني ليه دمعت

مترّجي بالنور

قلبي صبح مهجور

والوحده قتاله

ليه القلوب سلّمت

وسكتنا واتكلّمت

عن ود بات مكسور

عن هجر عاش الدور

وأنا وانتي رحاله

جوا الحروف علّمت



وعزولنا فينا شمت  
والحرف مش مجبور  
يكتب دموعي سطور  
عن فُرقه محتاله  
شمس الحياه غايبه  
فإزاي تشوف النور  
كل الحبال دايبه  
و إتقطعت بساطور  
بالله عليك تسكت  
و لا تكشف المستور  
سيب السنين تجري  
لو جه عليك الدور  
إركب يا واد مجري  
او نط برا السور

زرعت أرضك وفا  
الأرض طلعت بور  
حبك طريق مهجور  
و القلب مش مجبور  
يكمل الرحلة  
كل السكك وحله  
بس الحياه بتدور  
بكرة أكيد أحلى....

طعم البعاد قتال  
وأنا قلبي مش عتال  
ولا عمره لاف على مال  
أنا كنت عشان لقا  
طمعان يدوم الحال

وأفضل ف اشعارها

تكتبني ف سطورها

لو دمه تعصرها

تنزل على كفي

واتحني من نورها

# كتاب تاريخ

كنت فاکر نفسی فارس

كنت ميت بس حاسس

قلت بکره یکبر ابني

قلت يتعلم ويبنى

اشتریت له كتاب تاريخ

مااستفادشی غیر طبيخ

السلح کان نمره واحد

الصلاح ساکت وشاهد

التوابل لاقطه غاز

والشهيد محروق بجاز

والمجازر لحمه طازه فی الميدان

والعساكر مخلوقات من غير ودان

هات كمان ألفين مسجل م السجون  
واظبط الطبخه بالنصارى والدقون  
قسم البيت والوطن اكوام بشر  
رش اعلامك عليهم والعجر  
والكوادر والرموز مطلوب حضورهم  
يتقنوا الأزمات بدقه هوه دورهم  
خش ع الشعب المبستر  
هات طوايف دير وأزهر  
واطلب الحراق بسرعه  
جيشنا وطنى .. بجد إوعى  
تقلب الشربات عليك  
بس حاسب شيل إيديك  
طبختك باظت ياوطنى  
لونها لاحمر دم وطنى

نار وقادت حرقت الطبخه اللى باظت  
والشيايط وسط العياط والدنيا ظاظت  
المعاقل عمروها بالأفاضل والدقون  
واللصوص بروها بالدلائل والقانون  
كنت فاكّر نفسى فاهم  
كان منايا ف يوم أساهم  
واحكى لابنى عن نضالى  
التقيتنى جبان ضلالى  
والتقيتنى باشتري له كتاب تاريخ

## رايح فين؟

ليه يا صاحبي

كل ما اقفل باب جراحي

تفتحه

وأما اداوي القلب حبه

ليه مصمم تجرحه ؟

انت عارف ؟

...

انت عارف لما باضحك

وأما اقولك شوف مصالحك

ببقي مشتاق المسك

وباخفى دمعي وامسحه

....

أيوه عارف طعم حزنك

دُقْتُهُ ياما قبل منك

واللي حاصل واللي بحصل

بدعي ربي يحوشه عنك ...

....

اوعى تنسى حكم ربك

وللا تقسي ع اللي حبك

مهما تجري .. ومهما يجري

هو رزقك واتكتبك

...

متعافرشي ...

لو حكومتك قالت أمشي

والا ضيقتك منتهتشي



او عي تمشي

متغامرشي

مهما ضاق حالك يا قرشي

مش هانمشي

....

مهما ظلمك زاد يا بلدي

مش هانمشي

...

بكره يكبر فيكي ولدي

تحت رمشي

....

وأما يكبر عوده الأخضر

وأما يقدر يوم يقرر

هابقي اقوله يا بني غير

ف البلد دي عيش ودور  
مهما شفت اوعاك تهاجر  
مهما دوقت بلاش تغامر  
اللي قبلك ماتوا يا بني  
واللي عاشوا؟ ف العنابر ...

## وحشتينى

بقالى زمان وانا مهموم

كلام خلصان مالهش لزوم

ومش غلطان

ومش لاقى لكلامى مكان

قالوها زمان

( ياشوم الشوم على المحروم )

وع الحافى اللى شبعان نوم

أنا بحبل الوداد عايش لكن معدوم

بداية القول أنا أمى

بحبلى السرى متغمى

أنا والفرح متخاصمين

بقالنا سنين على ده الحال

وعندى عيال

وبيت واسع

بنيت جامع وماشى يمين

وخط السير ولا غلطه

وقلبى أسير ودى الورطه

وحشنى الحزن يا امايا

ماسبتش شبر ع الخارطه ماكلمتوش

سجين الماضى يا امايا وبقيت مرووش

وحشتينى يا جنه ونار

يومين فى الشهر مايكفوش

بالخاف مايجوش

وتفضى الدار

ياخير وعمار

وحشتینی

ما با وحشکیش ؟!

خلاص یامه بقیت درویش

لا باتأخر لنص الليل على القهوه

ولا باسهر فى عز البرد واستهوى

وأجلك لجل أنام وادفى

وأقوم واصحى على الدعوه

وحشتینی

وحشنى الحزن باللهفه

قدرتى تغيبى عن نفسك ؟!

وتنسى ان انتى مستشفی

ده قربك ليا مستشفی

وبعدك عنى مستشفی

ياحقنة روح بتستعفى

وحشتینی

وحشتینی بدون غیبه

یا بحر العطف والطیبه

یا آنه ورنه جوایا

ومهما کبرت مش عیبه

أقول یامه وحشتینی

یاسجن وحضن ومرایا

ماتیجی تعیشی ویایا

یاتاخذی ثواب واموت فیکى

وتغسلی روحى بادیکی

ویفضل حضنك العامر مدفینی

فی حضنك مش هاأقول فینی

وسیبی الكحل فی عینیکی

کفایه الدمعه تکفینی

تشيل ريحتك يا أغلى ملاك

تجيب سيرتك لأبويك هناك

تونسنا وتحكي لنا

وتشفع لي وتدعي لي

وليه يامه وحشتيني؟!!

## مسافر وهارجع

ولما هاترجع ...

هتلعن ابوها ....

يا عم انت فتح

دي عزبه وباعوها

وناقص نوقع

عشان يحلبوها

...

....

....

دي فيها وفيها وفيها وفيها

مرافق بتقطع



موارد سابوھا

....

مراكب بتغرق

حدود رستموها

....

دي فيها الحكومه

بتاخذ اتاوه

...

بندفع ضرايب

معزّه و غناوه

...

وفيها العساكر

تموت وبهداوه

...

وفيها الكوادر

بتاكل حلاوه

...

وفيها اللي قادر

بياخد علاوه

وتفضل يافقري

حياتك شقاوه

....

دي فيها وفيها

وفيها الأمان

...

براحتك هاتخرج

تقابل حنان

..

وترجع تلاقي

موبايلك كمان

...

دي فيها الدكاتره

ملايكه وغيلان

...

وفيهما المحاكم

رموز الميزان

...

تعالى وعلم

عيال الجيران

معاني المحبه

وكذب اللسان

...

دي فيها المشايخ

بتهوي الحسان

ف شرع المقدس

حرام الختان ...

دي فيها وفيها

وفيها الهوان

...

تعالى وكمل

هانرقص كمان

# خليك جدع

زعلان عليك وانت الجدع

شايل لوحدك هم جيل

شبعان وجع

كل البيبان اتقفلت

والأرض عذرا وخلفت

أيوه الحكايه اتألفت

واتزفتت

وبلدنا دورها الودع

يعني النهارده لو انت شيخ

بكره بقضيه لبست سيخ

انت المسيخ

انت اللي بوّظت الطبيخ  
إعلام فشيخ  
وانت الجدع  
خليك أسد دا الحق تار  
والصبر مش عايز شعار  
والجري مش كله فرار  
والهز مش ديل الحمار  
الهزه زلزال القرار  
أما الكبار  
انت اللي سميتهم كبار  
رغم الوجع  
رغم المرار اللي اتصدع  
خليك أسد وسط القطيع  
مليون ولد رافض يضيع

رافض يطبل للقروء والمسخره

قادر يكسر ألف قيد مهما جرى

لو تمنعوا عنه الدوا

أو تحبسوا عنه الهوا

لو تعملوا 100 مجزره

الحر مجبشي ورا

وما فيش أصيل

لا بتباع ولا يتشري

.....

## حد تاني

مش هاقول غير يلا روعي

كنت شايفك حاجه حلوه

واكتشفت انك متاهه

وببلايه سكتني جوه

كنت موهوم وبنزاهه

قلت محتاجه الاخوه

قلت أقرب من عنيني

وانتي سايقالي النبوه

حاطه نفسك فوق حدودي

رغم جودي وبمرّوه

وانتي لايفه لحد تاني



وريتيله بكل قوه  
وأما سابك جيتي عندي  
تلعبى الدور اللي هوه  
مش هاكممل فيلم بايخ  
بكفياكي انا مش فتوه ...

# حكاية القلب

ونبدأ زي أي اتنين

بيتلاقوا بنظرة عين

ويشتاقوا ويتقابلوا

وتكبر كلمه من حرفين

\* \* \*

تسهرهم سهاد وحنين

وتجمعهم شهور وسنين

ويطرح حلمهم جنبه

وفيها الفرحة والعاشقين

\* \* \*

يعيشوا الحلم جواهم

وطرُحه الحلو حلاهم

وتضحك دنيا كدابه

بتغوي وهي بيعاهم

\* \* \*

وتبدأ رحلة الاله

وتخلص فرحه عشناها

في قصة حب ف الجنه

ونلقي الدمعه نداهه

\* \* \*

ونشبك ايدنا من تاني

نعافر لاجل ما نعاني

واه ياني

نطاطي لقسمه مكتوبه

وفرحه وطرحه وخطوبه

وواحد تاني غير قلبك

بيسرق نُصك الثاني

\* \* \*

وتخلص قصة الحرفين

وتبدأ ذكرى قلب حزين

مفيش غير الدموع والآه

وجع وفراق

وكوم أوراق

ووردة بريحة الماضي

وقلب هديه كان نصين ...

## عنقود الفرح

عناقيد فرح.حبك طرح قصة حنين

وزرعت صوره جوا نذك من سنين

بتقول لمين ؟

عنقود عنب مفروط وناقص حبتين

طب راحوا فين

يمكن أنا والتانيه مين ؟

يمكن حبيب قلبي وحزين

طب روحنا فين ؟

متجمعين ؟

متمنعين أو مكسوفين ؟

أنا تهت والسكه بروحين

واخذ شمال وأنا ف اليمين

طب اروح لمين ؟  
والعمر شارك ف سباقين  
وخسرتهم  
وكسبت عنقود الفرحة مغسول بطين  
أنا مش ملاك ولا بامتلك  
غير قلب تايه ف السكك  
والحب قاصد يُنتهك  
م اللي قوي واللي نوى يرمي الشبك  
طول عمري مش لاقى سمك  
حتى الحبيبه اللي مصيرها مشترك  
زهقت وبعدت .  
ف الغيطان بين الشجر  
قالت طريقي مش فرح مليان خطر  
أدى القدر تفاحه واقع م الشجر

## بكره أحلى

ياللي طبعك ماله زيّ  
واللي زيتك قلبه حي  
واللي منك لحم نيّ  
طاويه عمرك ف اللي جيّ  
ناويه تكوي الفرحة كيّ  
بكره احلى وجيّ جيّ  
مش هايفرق بعده شيّ  
خلي شمعك يضوي ضيّ  
طلي لسه القلب خيّ  
لسه عاشق لسه فيّ

شهد يروي القلب ريّ  
وعد أخذه وأنت ويّ  
قلنا بكره ملهش هيّ  
والنهارده مطوي طي  
واللي فاتنا لحاله عيّ.  
منسى مهما قال وصيّ  
بكره احلى ..وانت في  
بكره يكمل وأنت ليّ

....



# رساله حب

بحبك

بحبك وانتى حسّاها

بحبك وانتى حبساها

بحبك دنيا بحروفها

بحبك قلبي مرساها بحبك

بحبك لسه مولوده

وحصة رسم ف الروضه

وقصة حب ف الجامعة

وهمسة لهفه موجوده بحبك

بحبك لسه مش فاهمه

وغيرتي عليكى ف الزحمه

ولو صدقه حضنت ايديكي اديكي

بتعلي الضحكه م اللخمه بحبك

بحبك وانتى مجنونه

ورابطه ف قلبي بلونه

جريتى وقلبي ف ايديكي

وقفتى ف حته مسكونه بحبك

بحبك خايفه نتقابل

وصدقه عنينا تتقابل

اشوف اللهفه ف عنيكى

صبرت وقلبي مش قابل بحبك

بحبك غنوه وحكايه

وصوره وضحكه جوايا

ومهما سكتى وبعدتى

ملكيتى يا روحى دنيايا بحبك

بحبك كل ما انتفس  
كبرت وحيي متأسس  
عاندت الدنيا علشانك  
ضعفتي وبرضو مش هياس بحبك  
بحبك درس ف كتابها  
بحبك نفسي اعاتبها  
بحبك كلمه ماتموتشي  
بحبك كله يكتبها .....

## ز علانه ليه ؟!

بقالها يومين ماردتشی بأی کلام

یا ضی العین ماتتعبینیش مع الأيام

هاشوفک فین وأشوف إزای ؟!

وانا اللى ما بینا ازیک ؟!

تمام وسلام

وها عمل ایه انا ف قلبی وعشق الروح

أخبی علیه وایه ذنبی وانا المجروح

أنا جیها ؟!

أغنیها واقول لها جای

با اخاف نتلاقى یکشفنی غرام مفضوح

بحبك قبل ماتقولی کبرت علیه

بحبك وقت ماتکونی الهوى ولياليه

بحبك بس مش عارف اقولها ازاي

بحبك زي ماتقولى ومن غير ليه

بقالك فتره تقلايه

وسايبه حروفى تنده لك

تكونش حبيبتي زعلانه

ودمع عيونى يستاهلك

تكونش حبيبتي تقلايه

ويمكن جايه على مهلك

بقالها يومين ماردتش ع السلامة

ماحدثش شافنى يحكى لها

ماحدثش شافنا فى حروفى وفى الكلمات

ماحدثش شافها فى عينيه يحايلها

ماحدثش زى فى الدنيا غرامه سكات

ومين قدى اللى بيحبك ويعملها

م انا المجنون اللى حبيتك بدون م احكى  
وانا المسجون اللى خبيتك ونفسى اشكى

ونفسى ابكى

ونفسى اسمعها من قلبك

فمهما الشك يلعب بك

مافيش غيرك

انا بيتك ومش ملكى

بحبك من سنين فانت

بحبك قلبى مش ساكت

بحبك عند فى الدنيا

وقلبى عياره بقى فالت

## يا بلدنا يا بلد

هربانه من قلبي. هيمانه ولوحدك  
ندماته على حبي ؟ والدمعه فوق خدك !  
لو عايزه تتحبي . وتحبي على قدك ؟  
لا تروحي من جنبي . ولا تخلفي وعدك ..  
كل الحكايه اتنين والدنيا مليانه  
وأنا وانتى متواعدين والفجر ويانا  
فاكره كلام العين ؟ فاكره القمر والليل  
فاكره الحكاوي الزين .. وإلا غناوي حليم  
وحشاني زي النيل زي العيال والطين  
وعيننا وجعانا فاكراني وأنا باضحك ؟  
وإلا انتي نساي

والله انا مسامحك وتملي جوابا  
حتى اسألي صبحك والكلمه والنايه  
بأتمنى اشوف فرحك .وف قلبي سلايه  
لسه الأمل والحلم وبكره والمكتوب  
لسه الألم والظلم والذكرى بالمقلوب  
مطلوب نسامح وطن منذ الأزل مصلوب  
أو نمشي عكس الزمن نوصل لأخره ذنوب  
نتوضي على أوله وف عز شوقنا نتوب  
ونصلي فرض العشا ونجيبها م الأول  
من قبل حتى العشا المعنى متأول  
نسهر سوا لوحدنا نتعلم الوحده  
نحكي الهوى يلما وناخذها بالواحد  
من عهد أول نبي نبش الوطن قلبه  
ولحد آخر صبي دش الوطن صلبه



ولبعد م تطبطبي ونخش ف مزايده  
محتاج اضمك يا وطن زي الضنا ملهوف  
محتاج ألمك يا وطن زي النصيب مايشوف  
ابعتلي سمك والكفن .لف الأمل بالخوف  
أو شد سهمك بقا واعمل كمان معروف  
رجعلي روعي هنا  
وارسم لجرحي قنا  
ممنوعه ليه يا بلد  
تتنازلي زي الولد.. وتقولي حبيتك  
تترازلي زي الوتد وتقولي شديتك  
مغصوبه ليه ع الهرب ..دا الحب زي الجرب  
والشعب ملهوش طلب . غير راسه مرفوعه...  
...غير راس ومرفوعه

## محتوى الكتاب

م	القصيدة	صفحة
1	بطاقة الكتاب	2
2	الإهداء	3
3	كلام فنجان	4
4	فى الغربه	7
5	ها اقول لك إيه	9
6	نصيب مقطوع	12
7	وايه يعنى	15
8	مانتيش أنا	17
9	لاء سعيدة	20
10	مش عارفنى	23
11	هيه زيك	26
12	مغرور	28

30	روحي ملكك	13
32	لازم أنسى	14
35	زوريني مره	15
37	كلام الليل	16
42	قلبي عندك	17
44	قلبي اختار	18
46	غصب عنى	19
50	عجبني البعاد	20
52	صابرة .. 1	21
54	صابرة .. 2	22
56	شمس الحياه	23
60	كتاب تاريخ	24
63	رايح فين	25
67	وحشتيني	26

72	مسافر وهاارجع	27
77	خليك جدع	28
80	حد تانى	29
82	حكاية القلب	30
85	عنقود فرح	31
87	بكره أحلى	32
89	رسالة حب	33
92	زعلانه ليه	34
95	يا بلدنا .. يا بلد	35
98	محتوى الكتاب	36

